

III.

Nic. Ranffts Czeydelweyde jm nyder Crews-
schener walde. 1486.

WIR Burgemeister vnnd Rathman der Stadt Gorlicz Bekennen uor ydermeniglich, das vor vns komen seyn dy Gestrengen woltuchtigen Caspar vnnd Georg von Gerszdorff zcu Rengersdorff vnnd habin vns eynen brieff vff papir geschriben mit desz gemelten Casp. von Gerszdorff Insigel vorsigelt ober eynen kauff lawtend, vorgelegit, begerinde, den In vnszer Statbuch zcu schreibn, den wir an papir schrift vnnd sigl unvormackelt vnc...irt vnd vnvorsert wy hynoch von worte zcu worte folget gesehen habin.

Ich Caspar vnnd Georg von Gerszdorff zcu Rengerszdorff gesessenn mit vnnszern rechten erben vnnd erbnehmern, WIR bekennen jnn dieszem offenbrieffe vor alle den dy en sehen horen adir leszin das wir eyn rechten erbkauff gehabit habin vnnd haben mit Nickel Ranfft zcu Tormerszdorff vnnd seynen erben vnnd erbnehmern vmbe dy zceydelweide jn deme neder Crewschner walde nemlich vor zcwey hundert margk dy denn itczvnde genge vnnd gebe seyn, eynen hvngl guld. vor 4 schock ane 4 gr. also sal der egnan. Nickl Ranfft oder seyne erben sulch bezalvnge thven dy montze hoette sich ader nedirte So lange bisz sulch zwen hvndert margk bezalet werden, nemlich vff alle oster heiltage x mr. So sal er mir ader seyne erben vnnd erbnehmen alle jor dovon czinszen eyn virtel von eyner tonne honiges, nemlich vff martini gen Rengerszdorff vff den hoff. Auch habn wir Jm mete vorkaufft alle gebewtte bewme vnnd welchen bawm er rappeln wil, dovon sal er geben dem ferster czwene gr. dy sal er dem erbherrn geben. Auch sal er eyne eyche alle jore habn zcu hawen, dy ehm dynet zcu klöchen. Auch sal er hawen wysche zcu seyner notdorfft vnde ap Im ynet eyn bawm zcu nohn stvnde der Im schaden brengin möchte, das sal er dem ferster sagen der sal en vorkeuffen ader wegk rewmen. Auch sal der obgnant Nickel Ranfft ader seyne erben eynen freien wegk habn zcu seynen bewtten zcu foren noch seyner notdorfft. Auch sal er hawen holcz